



Il mez da zercladur decida il suveran svizzer per ubain cunter la revisiun da la lescha da radio e televisiun.

FOTO G.N. STGIER

«Pli simpla, pli gista e pli bunmartgada»

Lescha federala davart radio e televisiun

DA GION NUTEGN STGIER / ANR

■ **In comité cun exponents da differents partidas ha preschentà ier a Cuira ils arguments a favur da la revisiun da la lescha federala davart radio e televisiun. La nova lescha saja ina adattaziun necessaria al consum da medias digitalas ed ella rinforzia cunzunt er las regiuns periferas.** En duas emnas decida il suveran svizzer tranter auter er pertutgant la midada da la lescha federala davart radio e televisiun. Il cussegl federal ed il parlament recumondan da far quella revisiun, dentant che davart dal mastregn e dal commerzi vegn ferma critica cunter quella nova lescha. Ier ha in comité independent, cun cusseglier naziunal *Martin Candinas* al timun, preschentà als meds da massa ils avantatgs da la nova lescha da radio e televisiun. Il cusseglier naziunal sursilvan ha ditg che cun far quella midada da la lescha paja il consum da radio e televisiun en l'avegnir ina taxa pli bassa, mintgin haja damain burocracia e controllas e cunzunt saja la lescha transparenta, correcta e gista.

Avantatgs grazia a la pauschala

La deputada da la ps, *Beatrice Baselgia*, beneventa cunzunt la taxa pauschala per il consum da radio e televisiun che la nova lescha prevesa. Cun far quella midada pajan tuts la nova taxa da 400 francs e nagina chasada mitscha da pagar la taxa per radio e televisiun. Da reducir la taxa da 462 francs per 15% saja cunzunt er pussaivel cun betg pli dar telespectaturs ed auditurs da radio che pajan nagina concessiun. *Duri Bezzola*, l'antieriu cusseglier naziunal da la pld, ha ditg che davart dals adversaris da la nova lescha circuleschia blera nunverdad ed el deploreschia che quai saja uschia. El en tuts cas recumonda da sustegnair la revisiun da la lescha da radio e televisiun cun esser quella pli simpla, pli gista e pli bunmartgada. 75% da las interpresas vegnan cun far la midada da quella lescha a pagar nagina taxa cun far ina svieuta sut in mez milliun francs, accentuescha *Duri Bezzola*. 9% da las interpresas vegnan a pagar damain per tadlar radio e guardar televisiun cun far ina svieuta sut in milliun francs. Tut las autras interpresas vegnan a pagar tranter 1000 e maximal

39 000 francs. Quai sajan en spezial gronds concerns che cumportan senz'auter quella taxa, ha menziunà *Duri Bezzola*, l'impresari da Scuol.

Er las valladas dal sid profitescan

La revisiun da la lescha da radio e televisiun vegnia cunzunt encunter a las persunas veglias che retirian prestaziuns supplementaras, ha menziunà *Duri Campell*, il president dal cussegl grond. Quellas persunas ed er ils cussadents da las chasas da tgira pajan cun far la revisiun da quella lescha naginas taxas en l'avegnir. Deputà *Alessandro Della Vedova* è persvas che cun introducir la nova lescha da radio e televisiun profitescian cunzunt er la Mesolcina, la Bregaglia ed il Puschlav. Il deputà da la pcd ha ditg che la RSI ed er RTR vegnian ad avair dapli muntada cun far quella revisiun da la lescha. Strusch auters meds electronics sajan preschents en las regiuns rumanzas e talianas da noss chantun, uschia che er quellas duas interpresas duajan profiter cun esser la taxa da concessiun pli correcta.